

ქალაქ თბილისის მუნიციპალიტეტის საკრებულოს

სახელდებისა და სიმბოლიკის კომისიის სხდომის

ოქმი N 31

28 მაისი, 2024 წელი

ქ. თბილისი, თავისუფლების მოედანი N 2

13:00 სთ

კომისიის სხდომას უძღვებოდა სახელდებისა და სიმბოლიკის კომისიის თავმჯდომარე ნინო ვარდოსანიძე.

სხდომას ესწრებოდნენ სახელდებისა და სიმბოლიკის კომისიის წევრები:

თინათინ ნიბლოშვილი

მარიამ ზაქარიაშვილი

შალვა ოგბაიძე

კომისიის თავმჯდომარემ კენჭი უყარა დღის წესრიგით წარმოდგენილ საკითხებს:

დღის წესრიგი

1. ქ.თბილისში, მთაწმინდის რაიონში, სოლომონ ზალდასტანიშვილის შესახვევისთვის და გასასვლელისთვის მომღერლის თამაზ სეფერთელაძის სახელის მინიჭების შესახებ
2. ქ.თბილისში, საბურთალოს რაიონში, მერაბ ალექსიძის ქუჩასთან მდებარე უსახელო სკვერისთვის კინომსახიობის ლიკა ქავჭავაძის სახელის მინიჭების შესახებ
3. ქ. თბილისში, საბურთალოს რაიონში, ტეხურის ქუჩისთვის ექიმ-ინფექციონისტის ვლადიმერ ბახუტაშვილის სახელის მინიჭების შესახებ
4. ქ. თბილისში, საბურთალოს რაიონში, დიდ დიღომში, იოანე პეტრიძის 4 ა კორპუსთან არსებული უსახელო სკვერისთვის შოთა ქარსელაძის სახელის მინიჭების შესახებ
5. ქ.თბილისში, კრწანისის რაიონში, ვახტანგ გორგასლის ქუჩის მონაკვეთისთვის კომპოზიტორის შალვა დავითაშვილის სახელის მინიჭების შესახებ
6. ქ.თბილისში, გლდანის რაიონში, აკაკი ვასაძის ქუჩისთვის რეჟისორის სანდრო ახმეტელის სახელის მინიჭების შესახებ
7. ქ.თბილისში, დიდუბის რაიონში, სანდრო ახმეტელის ქუჩისთვის რეჟისორისა და სცენარისტის დევი აბაშიძის სახელის მინიჭების შესახებ
8. ქ.თბილისში, სამგორის რაიონში, წნორისწყლის ქუჩისთვის რეჟისორისა და მხასიობის აკაკი ვასაძის სახელის მინიჭების შესახებ
9. ქ. თბილისში, სამგორის რაიონში, კახეთის გზატკეცილთან მდებარე უსახელო ქუჩისთვის და მასთან არსებული უსახელო სკვერისთვის სახელმწიფო და საზოგადო მოღვაწის იასონ ლორთქიფანიძის სახელის მინიჭების შესახებ
10. ქ. თბილისში, ჩუღურეთის რაიონში, მიხეილ ბუხაიძის I შესახვევისთვის მეან-გინეკოლოგის პალიკო კინტრაიას სახელის მინიჭების შესახებ

ნინო ვარდოსანიძემ კომისიის წევრებთან ერთად დღის წესრიგით წარმოდგენილი თითოეული საკითხი განიხილა.

პირველი საკითხი შეეხება მთაწმინდის რაიონში, სოლომონ ზალდასტანიშვილის შესახვევისთვის და გასასვლელისთვის მომღერლის თამაზ სეფერთელაძის სახელის მინიჭებას. პროფესიით ინჟინერი თამაზ სეფერთელაძე პროფესიულ საქმიანობასთან ერთად აქტიურად მოღვაწეობდა ესტრადაზე. ის იყო ანსამბლ „ცისფერი ტრიო“-ს წევრი, საქართველოს დამსახურებული არტისტი, საქართველოს სახალხო არტისტი, ღირსების ორდენის კავალერი.

თამაზ სეფერთელაძე ცხოვრობდა მთაწმინდის რაიონში, სოლომონ ზალდასტანიშვილის შესახვევის მონაკვეთთან. კომისიას მიზანშეწონილად მიაჩნია თბილისში არსებობდეს მისი სახელობის ქუჩა.

მეორე საკითხი შეეხება საბურთალოს რაიონში, მერაბ ალექსიძის ქუჩასთან მდებარე უსახელო სკვერისთვის კინომსახიობის ლიკა ქავჭავაძის სახელის მინიჭებას. ლიკა ქავჭავაძე იყო კინომსახიობი, კინოში განსახიერებულ ოცდაათამდე როლის მიუხედავად, განსაკუთრებული აღიარება მას თენგიზ აბულაძის „ნატვრის ხეში“ შესრულებულმა მარიტას როლმა მოუტანა. თავად ამბობდა: „მარიტამ მართლაც რომ წარუშლელი კვალი დატოვა არა მარტო ჩემს კარიერაში, არამედ, ზოგადად, ცხოვრებაში. იმის მიუხედავად, რომ საკმაოდ ბევრ ფილმში ვითამაშე, „ნატვრის ხე“ მაინც სხვა იყო. დღემდე სწორედ ამ ფილმით მიხსენებენ. მარიტას როლი ცხოვრების ბოლომდე გამყვება“. კომისიამ დადებითად შეაფასა აღნიშნული ინიციატივა.

მესამე საკითხის განხილვისას ნინო ვარდოსანიძემ ისაუბრა საბურთალოს რაიონში, ტეხურის ქუჩისთვის ექიმ-ინფექციონისტის ვლადიმერ ბახუტაშვილის სახელის მინიჭების თაობაზე. ვლადიმერ ბახუტაშვილის სამეცნიერო ინტერესები სხვადასხვა დროს მოიცავდა კლინიკური და ექსპერიმენტული მედიცინის ისეთ დარგებს, როგორც არის ინფექტოლოგია, ვირუსოლოგია, იმუნოლოგია და იმუნორეაბილიტაცია, სამედიცინო ბიოტექნოლოგია. მის მიერ შექმნილმა პრეპარატმა, რამაც საფუძველი ჩაუყარა საქართველოში სამედიცინო ბიოტექნოლოგიის განვითარებას, საერთაშორისო აღიარება მოიპოვა. ვლადიმერ ბახუტაშვილი სიცოცხლის ბოლო წლებში მუშაობდა აპოპტოზისა და ღეროვანი უჯრედების პრობლემებზე. იგი სამასზე მეტი სამეცნიერო ნაშრომის, რამდენიმე სახის მედიკამენტის, მათ შორის საყოველთაოდ ცნობილი პლაფერონის ავტორია. კომისიამ მიზანშეწონილად მიიჩნია დედაქალაქში არსებობდეს ვლადიმერ ბახუტაშვილის სახელობის ქუჩა.

მეოთხე საკითხი შეეხება საბურთალოს რაიონში, დიდ დიღომში, იოანე პეტრიძის 4ა კორპუსთან არსებული უსახელო სკვერისთვის შოთა ქარსელაძის სახელის მინიჭებას. შოთა ქარსელაძემ მთელი თავისი შეგნებული ცხოვრება სხვების დახმარებას მიუძღვნა, მან საკუთარი სიცოცხლის სანაცვლოდ გადაარჩინა 13 წლის გოგონა მდინარე მტკვარში დახრჩობას. ქალაქ თბილისში, მდინარე მტკვარში ადამიანის გადარჩენისას გამოვლენილი სამაგალითო სამოქალაქო თავდადებისთვის, განსაკუთრებული მოქალაქეობრივი პასუხისმგებლობისა და პიროვნული მამაცობისთვის პრეზიდენტის განკარგულებით შოთა ქარსელაძე დაჯილდოვდა მედლით „სამოქალაქო თავდადებისთვის“ (სიკვდილის შემდეგ).

შოთა ქარსელაძე სიცოცხლის განმავლობაში ცხოვრობდა დიდ დიღომში, იოანე პეტრიძის ქ. 4 ა კორპუსში. კომისიამ დადებითი რეკომენდაცია მისცა აღნიშნულ საკითხს.

მეხუთე საკითხი შეეხება კრწანისის რაიონში, ვახტანგ გორგასლის ქუჩის მონაკვეთისთვის კომპოზიტორის შალვა დავითაშვილის სახელის მინიჭებას. შალვა დავითაშვილი იყო საქართველოს ხელოვნების დამსახურებული მოღვაწე და თბილისის საპატიო მოქალაქე.

კომისიამ მიზანშეწონილად მიიჩნია თბილისში არსებობდეს შალვა დავითაშვილის სახელობის ქუჩა, კომპოზიტორის ოჯახის წევრებთან კონსულტაციისას დადგინდა, რომ

შალვა დავითაშვილი ცხოვრობდა კრწანისის რაიონში, ვახტანგ გორგასლის ქუჩის მიმდებარე ტერიტორიაზე.

მეექვსე, მეშვიდე და მერვე საკითხები შეეხება რეჟისორების სანდრო ახმეტელის, დევი აბაშიძისა და აკაკი ვასაძის ქუჩების სახელდებას. ნინო ვარდოსანიძემ კომისიის წევრებს გააცნო შემდეგი საკითხები.

დევი აბაშიძეს დიდი წვლილი მიუძღვის ქართული კინემატოგრაფიის განვითარებაში. 1957 წლიდან გარდაცვალებამდე ის მუშაობდა რეჟისორად კინოსტუდია ქართულ ფილმში. როგორც რეჟისორს გადაღებული აქვს ფილმები: „დიდოსტატის მარჯვენა“, „ჩადირული ქალაქის მადიებლები“, როგორც სცენარისტი მუშაობდა ფილმებზე: „ომი ყველასთვის ომია“, „ყვარყვარე“, „წითელი პატეფონი“ და როგორც მეორე რეჟისორი მუშაობდა ფილმებზე: „ნინო“, „ჭიაკოკონა“, „ალავერდობა“, „ბოდიში, თქვენ გელით სიკვდილი“. კომისიამ შეისწავლა აკაკი ვასაძის ქუჩის გავრცელების არეალი და მისთვის სახელის მინიჭების ისტორია. გლდანის რაიონში, სანდრო ახმეტელის სახელობის თეატრი წარმოადგენს მნიშვნელოვან კულტურულ კერას, სანდრო ახმეტელის სახელობისაა ასევე ქალაქში ერთ-ერთი ყველაზე მეტად დატვირთული მეტროსადგური, თეატრი და ხსენებული სადგური ერთობლიობაში წარმოადგენს ქალაქში ერთ-ერთ ძირითად ლოკაციას, შესაბამისად მიზანშეწონილია ქუჩას, სადაც თეატრი მდებარეობს ერქვას სანდრო ახმეტელის სახელი. დღეს არსებული სანდრო ახმეტელის ქუჩა მდებარეობს კინოსტუდია „ქართული ფილმისა“ და დიღმის ტყეპარკის მიმდებარედ, ქუჩისთვის რეჟისორ დევი აბაშიძის სახელის მინიჭების ინიციატივა თემატურობის გათვალისწინებით ასევე მხარდაჭერილია სტუდიის მიერ.

სახელდებისა და სიმბოლიკის კომისიას რამდენჯერმე მომართეს, როგორც წნორისწყლის, ასევე „დ“ ქუჩის მაცხოვრებლებმა და მოითხოვეს ქუჩის სახელწოდების ცვლილება და ნუმერაციის საკითხების მოწესრიგება. კომისიამ შეისწავლა ხსენებული არეალი, როგორც დადგინდა „დ“ ქუჩა არ წარმოადგენს დამოუკიდებელ ქუჩას და უნდა ჩამოყალიბდეს ძირითად ქუჩასთან მდებარე შესახვევად წნორისწყლის სახელის შესწავლისას დადგინდა, რომ წნორისწყალი იყო ჯერ რადიოსადგური, შემდგომ რკინიგის სადგური, რომლის შემოგარენშიც მოსახლეობის ზრდის შემდეგ, XIX საუკუნეში წარმოიქმნა წნორი, შესაბამისად ხსენებული სახელწოდება არ არის თბილისთან დაკავშირებული და დედაქალაქისთვის ავთენტური ტოპონიმი, ამდენად მისთვის სახელის გადარქმევა მიზანშეწონილია. კომისიამ დადებითად გადაწყვიტა აღნიშნული საკითხები.

ასევე დადებითად გადაწყვიტა კომისიამ სამგორის რაიონში, კახეთის გზატკეცილთან მდებარე უსახელო ქუჩისთვის და მასთან არსებული უსახელო სკვერისთვის სახელმწიფო და საზოგადო მოღვაწის იასონ ლორთქიფანიძის სახელის მინიჭების საკითხი. იგი იყო საქართველოს სახელმწიფო ბანკის პირველი მმართველი, დამოუკიდებლობის აქტის ერთ-ერთი ხელისმომწერი. იასონ ლორთქიფანიძეს განსაკუთრებული წვლილი მიუძღვნის ცენტრალური ბანკის ჩამოყალიბებაში, რასაც დამოუკიდებლობის წლებში დიდი

მნიშვნელობა ენიჭებოდა. ასევე, გამორჩეულია მისი ღვაწლი სხვა არაერთ ეროვნულ საქმეშიც. იასონ ლორთქიფანიძე იყო პირველი ქართული უნივერსიტეტის დამაარსებელი კომისიის წევრი, ხელმძღვანელობდა ქართველთა შორის წერა-კითხვის გამავრცელებელ საზოგადოებას; სწორედ მისი თაოსნობით მოიძიეს განჯაში ნიკოლოზ ბარათაშვილის საფლავის ადგილსამყოფელი, რის შემდეგაც მისი ნეშტი სამშობლოს დაუბრუნდა. კომისიამ დადებითად შეაფასა აღნიშნული ინიცირება.

ნინო ვარდოსანიძემ კომისიის წევრებს გააცნო დღის წესრიგით წარმოდგენილი მეათე საკითხი, რომელიც შეეხება ჩუღურეთის რაიონში, მიხეილ ბუხაიძის I შესახვევისთვის მეან-გინეკოლოგიის პალიკო კინტრაიას სახელის მინიჭებას. პალიკო კინტრაია მთელი ცხოვრება ემსახურა მედიცინის ურთულეს დარგს- დედათა და ბავშვთა ჯანმრთელობის დაცვას. მის მიერ თანაავტორებთან ერთად პირველად შემუშავებულ იქნა მშობიარობის დროს ნაყოფის პირდაპირი ელექტრო-კარდიოგრაფიის მეთოდი. გამოქვეყნებული აქვს 200-მდე სამეცნიერო შრომა. მათ შორის 14 გამოგონება. მისი ხელმძღვანელობით ინსტიტუტს და ასოციაციას ჰქონდა გრძელვადიანი საერთაშორისო ხელშეკრულება იაპონიის ტოკიოს უნივერსიტეტის, ინგლისის სოუთემპტონის უნივერსიტეტის, გერმანიის ჰაიდელბერგის უნივერსიტეტის ბუდაპეშტის ექიმთა დახელოვნების ინსტიტუტის მეანობა-გინეკოლოგიის კათედრებთან. კომისიამ დადებითი რეკომენდაცია გაუწია აღნიშნულ საკითხს.

ნინო ვარდოსანიძის განცხადებით, წარმოდგენილი საკითხები მოქმედი კანონმდებლობის შესაბამისად ინიციატივებად დარეგისტრირდება საკრებულოს წინაშე, რეგისტრაციიდან არაუადრეს 20 დღისა გაიმართება საჯარო განხილვა და ამის შემდგომ მოხდება საკრებულოს სხდომაზე გატანა.

სხდომის თავმჯდომარემ სხდომა დახურულად გამოაცხადა.

სახელდებისა და სიმბოლიკის

კომისიის თავმჯდომარე

ნინო ვარდოსანიძე

